

HARI ISNIN, 16 MEI 1994, PUKUL 2.30 PETANG

***1. Tuan Rahim bin Baba** minta Perdana Menteri menyatakan:

- (a) berapakah bilangan Umat Islam yang menunaikan fardu Haji bagi tahun 1993 dan 1994 dan anggaran bagi tahun 1995; dan
- (b) oleh kerana pihak Kerajaan Arab Saudi telah menetapkan kuota, apakah Lembaga Urusan Tabung Haji tidak bercadang untuk mengkaji semula cara pemilihan sekarang dari sistem pendaftaran dulu didahulukan kepada sistem yang lebih adil di mana mereka yang tidak pernah menunaikan fardu Haji diberikan keutamaan.

***2. Dr. Toh Kin Woon** minta Menteri Kebudayaan, Kesenian dan Pelancongan menyatakan:

- (a) sudah adanya berapa kes pemandu pelancong ditahan oleh pihak-pihak tertentu di Republik Rakyat Cina dalam 1993 dan 4 bulan pertama 1994;
- (b) apakah sebab-sebabnya yang membawa kepada penahanan ini; dan
- (c) apakah langkah-langkah yang akan diambil untuk mengelakkan kejadian seperti ini berulang pada masa depan.

- *3. Puan Sri Sarasa Pasamanickam** minta Menteri Pendidikan menyatakan:
- (a) jumlah kes rogol dan mencabul kehormatan yang melibatkan pelajar-pelajar sekolah; dan
 - (b) adakah Kerajaan bercadang untuk memperkenalkan seni mempertahankan diri sebagai satu aktiviti melalui pendidikan jasmani di sekolah-sekolah bagi pelajar-pelajar perempuan.
- *4. Tuan Chong Chi Siong** minta Menteri Kewangan menyatakan:
- (a) jumlah rakyat Malaysia yang membayar cukai pendapatan dan jumlah hasil yang diperolehi; dan
 - (b) sejauhmana kesannya sejak program ke arah peningkatan kualiti dan produktiviti melalui minggu perkhidmatan pembayar cukai.
- *5. Tuan Dol bin Dollah** minta Menteri Perdagangan Antarabangsa dan Industri menyatakan bagaimanakah sambutan rakyat Malaysia pada masa ini menjelang tahun 2000 terhadap barang-barang buatan Malaysia memandangkan masih terdapat sebilangan besar rakyat kita masih ragu dengan kualiti dan mutu barangan buatan Malaysia.
- *6. Datuk Haji Ahmad bin Haji Abdullah** minta Menteri Pertanian menyatakan memandangkan harga daging lembu Tempatan adalah diparas yang tinggi, adalah beliau sedar bahawa masanya telah tiba untuk Malaysia mengimport daging lembu daripada Argentina. Apakah usaha yang dijalankan untuk mengimport daging lembu daripada Argentina supaya kita tidak bergantung kepada Australia dan New Zealand.
- *7. Tuan Johan B.O.T. Ghani** minta Menteri Kerja Raya menyatakan adakah rancangan Kementerian tersebut untuk mengambilalih pentadbiran Jabatan Air Negeri Sabah.
- *8. Tuan K. Munisamy** minta Menteri Pendidikan menyatakan mengenai isu yang telah dibangkitkan pada 20-12-93, Mesyuarat Ketiga, Penggal Ketiga di Dewan Negara mengenai masalah yang dihadapi oleh SRJK (Tamil) Batu Gajah:
- (a) apakah tindakan pihak kerajaan terhadap isu tersebut; dan
 - (b) adakah kerajaan memberi peruntukan kemudahan untuk memperluaskan kawasan sekolah supaya dapat membina sebuah padang permainan untuk sekolah tersebut.
- *9. Puan Habshah binti Haji Osman** minta Menteri Pendidikan menyatakan:
- (a) dasar pengajian tinggi negara memandangkan perkembangan-perkembangan negatif yang terdapat di kalangan institusi-institusi swasta yang tidak langsung mengambil kira bukan sahaja mutu bahkan kebajikan pelajar-pelajar;
 - (b) adakah Kementerian Pendidikan berhasrat untuk mengulangkaji dasar pendidikan institusi tinggi agar unsur negatif yang membawa implikasi

yang tidak diingini tidak berterusan dan menjejaskan dasar pendidikan negara dengan mengadakan peraturan-peraturan yang lebih ketat untuk memastikan:

- (i) mutu pelajaran tinggi adalah sejajar dengan dasar pendidikan tinggi negara;
- (ii) mutu kelulusan dan etika mengajar guru-gurunya adalah dapat mentauladani tidak sebaliknya menimbulkan berbagai masalah sosial; dan
- (iii) kawalan disiplin terhadap penuntut – pergaulan penuntut dengan penuntut dan juga dengan penuntut dan juga guru dan penuntut selain daripada pakaian, rambut dan tingkah laku.

***10. Datin Hajah Wan Intan Wan Ahmad Tajuddin** minta Menteri Pendidikan menyatakan sama ada beliau sedar bahawa disiplin murid-murid sekolah pada masa ini sudah menurun hingga berlaku perkara-perkara seperti murid-murid memukul guru, murid-murid memukul murid-murid lain dan sebagainya. Jika sedar, nyatakan langkah-langkah yang telah dan akan diambil oleh Kementerian Pendidikan untuk mengatasi gejala buruk ini.

***11. Tuan Fu Ah Kiow** minta Menteri Perdagangan Antarabangsa dan Industri menyatakan:

- (a) apakah implikasi penyelesaian perundingan dan tandatangan GATT terhadap ekonomi Malaysia pada amnya dan khususnya terhadap industri perkhidmatan, industri kecil dan sederhana; dan
- (b) apa tindakan yang akan diambil oleh Kementerian untuk melindungi pengusaha tempatan yang terlibat dan menyediakan mereka menghadapi cabaran baru.

***12. Tuan Abdul Rashid bin Ismail** minta Menteri Pendidikan menyatakan adakah pihak Kementerian sudah mengenalpasti mengenai dakwaan terdapat beberapa buah kolej swasta mempunyai program berkembar dengan universiti terkenal di luar negara benar-benar ujud.

***13. Tuan Haji Hanipah bin Ahmad** minta Menteri Luar Negeri menyatakan sejauh manakah kejudahan balik perhubungan dari segi ekonomi dan politik hasil dari lawatan Perdana Menteri ke Filipina dan apakah langkah-langkah susulan yang diambil bagi mengujudkan fahaman “Co-existence” bagi isu Pulau Spratly, APEC dan EAEC.

***14. Tuan Michael Bong Thiam Joon** minta Menteri Penerangan menyatakan sama ada rancangan TV yang diimport dari negara seperti CNN mendatangkan faedah jangka panjang ke Malaysia, dan jika ya, adakah Kementerian ini bercadang untuk mengimport filem-filem dari syarikat TV lain seperti “STAR TV” ditayangkan di kaca TV kita. Dan jika bersetuju, berapakah kos bayaran terhadap kedua rangkaian TV asing ini.

***15. Puan Hajah Rahmah bt. Salleh** minta Menteri Kesihatan menyatakan berapa ramaikah doktor-doktor yang mendapat biasiswa dari Kerajaan telah keluar iaitu tidak berkhidmat dengan Kerajaan setakat ini, jika benar begitu apakah mereka telah memenuhi syarat-syarat yang telah ditetapkan kepada mereka-mereka ini iaitu setiap pelajar yang menerima biasiswa apakala telah tamat dan berjaya mestilah berkhidmat dengan Kerajaan sekurang-kurangnya lima tahun dan adakah mereka-mereka ini keluar sesudah habis tempuh yang diwajibkan atau tidak.

***16. Tuan Haji Zainal bin Md. Deros** minta Menteri Perpaduan Negara dan Pembangunan Masyarakat menyatakan:

- (a) berapa banyak kes mendera kanak-kanak dan isteri sejak tahun 1991; dan
- (b) nyatakan berapa kes yang dibawa ke mahkamah untuk menuntut keadilan.

***17. Datuk David Yeoh Eng Hock** minta Menteri Dalam Negeri menyatakan berapa ramaikah kontraktor-kontraktor tempatan yang melindungi buruh-buruh asing yang datang tanpa dokumen sah dan apakah usaha untuk mengelakkan kejadian seperti ini tidak berulang lagi.

***18. Tuan Limun Laikim** minta Menteri Luar Negeri menyatakan apakah usaha-usaha terkini yang dijalankan oleh Malaysia untuk menamatkan Peperangan di Bosnia Hazergovina, khasnya di Bandar Gorazde yang sedang di kepong oleh pengganas Serb, dan adakah Kerajaan bercadang untuk menambahkan lagi askar-askar Malaysia di Bosnia.

***19. Tuan Tiong Thai King** minta Menteri Perdagangan Antarabangsa dan Industri menyatakan sama ada pelaburan-pelaburan asing akan lebih banyak datang ke Malaysia setelah ditubuhkan EAEC.

***20. Dato William Chek Lin Kwai** minta Menteri Perusahaan Awam menyatakan:

- (a) jumlah permohonan yang diterima untuk memohon lesen kenderaan komersial dan perdagangan bagi tahun 1991 hingga Mac 1994 dan jumlah pemohon yang berjaya bagi tempoh tersebut untuk kesemua jenis;
- (b) jumlah pemohon yang berjaya dalam permohonan mereka tetapi tidak dapat membuat pendaftaran kenderaan mereka. Dan adakah Kementerian bercadang untuk membatalkan lesen mereka ini setelah tamat tempoh had masa yang diberikan untuk mendaftarkan lesen mereka; dan
- (c) memandangkan sejak kebelakangan ini berlaku banyak kes di mana pemandu dan konduktor bas mini telah melakukan keganasan terhadap penumpang bas mini, apakah tindakan Kementerian dalam kes-kes seperti ini.

***21. Tuan Ibrahim bin Daud** minta Menteri Luar Negeri menyatakan hasil lawatan beliau ke Kemboja dan Laos baru-baru ini.

***22. Puan Hajah Selemiah binti Hashim** minta Menteri Perpaduan Negara dan Pembangunan Masyarakat menyatakan:

- (a) berapa banyakah bilangan Sekolah Seliaan yang ada di negara ini dan bilangan penuntutnya;
- (b) apakah kes-kes yang dihantar ke Sekolah ini; dan
- (c) apakah kemudahan pendidikan yang diberikan kepada mereka.

***23. Puan Hajah Rahaiah binti Baheran** minta Perdana Menteri menyatakan:

- (a) bilakah Kementerian bercadang untuk mengubah hentian Pudu Raya ke kawasan yang lebih strategik untuk kemudahan orang awam, memandangkan kawasan tersebut semakin sesak dan orang awam terpaksa memikul barang-barang yang berat disebabkan kemudahan yang terhad; dan
- (b) sekiranya ada, di manakah tapak cadangan tersebut dan adakah Kementerian bercadang untuk menyediakan segala kemudahan termasuk tangga bergerak untuk kemudahan orang awam.

***24. Puan Kelsom binti Yaacub** minta Menteri Pendidikan menyatakan bilakah Kementerian Pendidikan akan membaharui buku-buku teks di sekolah-sekolah rendah kebangsaan sejak tahun 1982 masih digunakan lagi, sedangkan pembelajarannya terlalu rendah kalau dibandingkan dengan kemajuan kanak-kanak masa kini.

***25. Puan Hajah Che Pora binti Haji Omar** minta Menteri Dalam Negeri menyatakan adakah Kerajaan bercadang untuk menambah mewujudkan lebih banyak pusat jagaan lanjutan penagih dadah di seluruh negara bagi tempoh dua hingga tiga tahun akan datang.

***26. Tuan Isli Haji Siput** minta Menteri Luar Negeri menyatakan apakah reaksi Kerajaan Malaysia terhadap perjanjian damai di antara Israel dan PLO baru-baru ini. Adakah Malaysia akan menggubal dasar luarnya terhadap Israel.

***27. Tuan Isli Haji Siput** minta Menteri Luar Negeri menyatakan:

- (a) pandangan Kerajaan Malaysia terhadap tujuan Amerika Syarikat atas pembentukan 'APEC' dan hubungkaitnya terhadap 'EAEC';
- (b) jika perbezaan pandangan YAB Perdana Menteri terhadap persidangan 'APEC' di Seattle dengan pemimpin 'ASEAN' yang lain boleh menimbulkan perasaan salah faham; dan
- (c) pandangan Malaysia terhadap 'NAFTA' yang dianjurkan oleh Amerika Syarikat.

***28. Tuan Itam Wali bin Nawan** minta Menteri Pembangunan Luar Bandar menyatakan bahawa pendapatan Orang Asli dalam projek pembangunan tanah di beberapa buah Rancangan Pengumpulan Semula (RPS) Orang Asli oleh FELCRA adalah @ RM 50/- sebulan sekeluarga:

- (a) adakah projek pembangunan tanah ini berupaya meningkatkan ekonomi peserta-peserta Rancangan Pengumpulan Semula (RPS); dan
- (b) Orang Asli selaku peserta Rancangan Pengumpulan Semula (RPS), tetapi tenaga kerja mereka tidak dilibatkan dalam menjayakan rancangan dan mengeluarkan hasil. Tenaga kerja tersebut diberi kepada buruh-buruh asing. Apakah tindakan susulan supaya Orang Asli selaku peserta rancangan turut dilibatkan tenaga buruh mereka dalam rancangan tersebut.

***29. Puan Rosalind Yau Shuk Meng** minta Menteri Perdagangan Antarabangsa dan Industri menyatakan sejauh mana pencapaian Industri berasaskan bahan tempatan dicapai. Berapa jumlah Industri yang telah menembusi pasaran antarabangsa.

***30. Tuan Haji Saidin bin Mohamad** minta Menteri Pengangkutan menyatakan adakah pejabat JPJ di bandar-bandar kecil diwujudkan terutama di Padang Besar dan di Kuala Perlis, Perlis kerana kedua-dua pekan kecil itu jauh daripada JPJ Negeri.

***31. Dato' K. Vijayanathan** minta Menteri Belia dan Sukan menyatakan berhubung dengan kematian mengejut pelari deras Antarabangsa Rabia Abdul Salam, bolehkah beliau memberi keterangan mengenai perkembangan daripada kedua-dua penyiasatan iaitu penyiasatan dan polis, pandangan sifat-sifat bolehkah beliau mengesahkan sama ada beliau telah dimaklumkan mengenai perkembangan-perkembangan penyiasatan polis dan jika ya, apakah kedudukan terkini daripada penyiasatan sedemikian.

***32. Tuan Ho Cheng Wang** minta Menteri Dalam Negeri menyatakan berapakah rakyat Malaysia yang memegang paspot antarabangsa telah tinggal di luar negeri melebihi tempoh masa yang diberikan pada masa setakat ini. Sila juga menyatakan jumlah mereka dan di negeri mana.

***33. Tuan Haji Shuib bin Haji Endut** minta Menteri Belia dan Sukan menyatakan kenapakah kes pencabulan athlit yang dilaporkan berlaku dari tahun 1989 baru kini hendak disiasat. Apakah tindakan yang akan diambil ke atas badan/persatuan sukan yang cuba menyembunyikan kes yang amat memalukan dunia sukan tanahair itu.

***34. Tuan Haji Shuib bin Haji Endut** minta Menteri Perumahan dan Kerajaan Tempatan menyatakan berapakah jumlah projek perumahan kos rendah yang telah didirikan di seluruh negara mengikut negeri sejak dari tahun 1992. Adakah beliau sedar harga rumah yang ditawarkan oleh pihak pemaju bukanlah harga rumah kos rendah seperti yang ditetapkan oleh Kerajaan. Jika sedar, apakah tindakan yang akan diambil oleh Kementerian untuk mengatasi masalah ini.

***35. Dato' Zainol Abidin bin Johari** minta Menteri Pertahanan menyatakan sama ada pemborong-pemborong dan pembekal-pembekal yang berdaftar di KEMENTAH menderma kepada Tabung Derma Rayuan Hari Pahlawan. Kalau ada sebutkan nama syarikat, kalau tidak mengapa.

***36. Dato' Zainol Abidin bin Johari** minta Perdana Menteri menyatakan apakah syarat dan cara pemilihan bakal-bakal Haji Malaysia ke Mekkah menunaikan fardhu haji.

***37. Tuan Shahiruddin Ab. Moin** minta Menteri Penerangan menyatakan kesan siaran TV bermula pada sebelah pagi dan apakah akan kita adakan siaran 24 jam pula.

***38. Tuan Chong Chi Siong** minta Menteri Pendidikan menyatakan:

(a) apakah langkah yang diambil oleh pihak Kementerian bagi mengatasi kemerosotan pencapaian mata pelajaran Moral dalam SPM tempoh hari itu; dan

(b) apakah langkah yang telah diambil bagi menangani kemerosotan disiplin pelajar di sekolah.

***39. Puan Habshah binti Haji Osman** minta Menteri Pendidikan menyatakan sama ada Kementerian bercadang untuk membuat kajian tentang pelaksanaan dan penguatkuasaan undang-undang yang boleh mensabitkan mereka yang melakukan kesalahan yang melibatkan ahli-ahli sekolah iaitu guru-guru pentadbir dan murid-murid terutamanya di dalam bidang salahlaku dan disiplin. Ini memandangkan bidang kuasa Kementerian Pendidikan bukan hanya sekadar mendidik tetapi juga bertanggungjawab untuk menjaga kebajikan moral dan fizikal dan kesihatan murid-murid.

***40. Tuan Abdul Rashid bin Ismail** minta Menteri Pertahanan menyatakan sejauh manakah keberkesanan pelaksanaan reformasi ketenteraan khususnya dalam TUDM yang telah dijalankan ekoran tragedi pesawat jenis Cessna 402 terhempas di Lapangan Terbang Batu Berendam Melaka pada 15 April lalu.

***41. Tuan Michael Bong Thiam Joon** minta Menteri Pendidikan menyatakan berapa buahkah sekolah persendirian Cina di Sabah dan daripada itu berapakah mendapat peruntukan daripada Kerajaan Persekutuan dan bilakah peruntukan ini diberi, yakni sejak tahun bila.

***42. Tuan Haji Zainal bin Md. Deros** minta Menteri Kewangan menyatakan berapakah nilai kontrek syarikat Inggeris yang sebenarnya akibat perubahan dasar Kerajaan Malaysia terhadap firma-firma Inggeris disebabkan Media Massa Inggeris keterlaluan menuduh pemimpin Malaysia dan adakah Kerajaan akan berubah sikap memulihkan keadaan seperti biasa disebabkan ramai pemimpin Kerajaan Inggeris sudah pun mengakui kesilapan dan kelemahan kebebasan akhbar di Britain.

***43. Datuk David Yeoh Eng Hock** minta Menteri Perpaduan Negara dan Pembangunan Masyarakat menyatakan:

- (a) berapakah bilangan rumah-rumah orang tua yang wujud di negara ini dan nyatakan pihak manakah yang membiayai rumah-rumah orang tua ini; dan
- (b) sama ada pihak swasta ada mendirikan rumah-rumah orang tua dan berapa dikenakan bayaran setiap orang yang menduduki rumah orang tua yang didirikan oleh pihak swasta.

***44. Puan Hajah Selemiah binti Hashim** minta Menteri Pendidikan menyatakan penubuhan kolej-kolej swasta yang begitu menggalakkan dewasa ini amatlah dialu-alukan kerana ianya mencerminkan rakyat Malaysia yang cintakan keilmuan:

- (a) apakah tindakan Kerajaan terhadap pentadbiran Kolej-kolej yang hanya mengejar keuntungan semata-mata dan bukan untuk meningkatkan bidang keilmuan; dan
- (b) adakah hanya cukup untuk pada akta sahaja tanpa perlu dikuatkuasakan.

***45. Puan Hajah Rahaiah binti Baheran** minta Menteri Dalam negeri menyatakan:

- (a) kekeliruan tangga gaji anggota polis peringkat rendah, iaitu tangga gaji Kopral dan Lans Kopral sekarang dan tangga gaji konstabal yang tidak selaras, di mana konstabal yang mempunyai kredit Bahasa Melayu mempunyai gaji yang lebih tinggi daripada konstabal yang tidak mempunyai kredit Bahasa Melayu, walaupun mempunyai kredit dalam mata pelajaran lain, sedangkan mereka telah lama dalam perkhidmatan; dan
- (b) bilakah Kementerian bercadang untuk menaikkan elaun perumahan untuk anggota-anggota polis, pegawai penjara dan anggota bomba memandangkan elaun perumahan adalah terlalu sedikit berbanding dengan kenaikan sewa rumah, terutama di bandar-bandar besar sekarang.

***46. Tuan Haji Saidin bin Mohamad** minta Menteri Perusahaan Awam menyatakan bagaimanakah kedudukan penuntut-penuntut lepasan IKM, adakah mereka mendapat apa-apa pinjaman modal bagi mengusahakan perniagaan atau bagi mereka yang tidak berkemampuan diserapkan dalam mana-mana institusi perniagaan.

***47. Tuan Ho Cheng Wang** minta Menteri Kewangan menyatakan apakah tindakan atau prosidur diambil oleh Kementerian untuk mengawal peniaga panggung wayang yang selalu menaikkan harga tiketnya mengikut sukahati mereka.

***48. Tuan Shahiruddin Abdul Moin** minta Menteri Perpaduan Negara dan Pembangunan Masyarakat menyatakan agar dikaji semula kadar bantuan kepada penerima bantuan bulanan terutama sekali bagi orang-orang tua.

***49. Tuan Shahiruddin Abdul Moin** minta Perdana Menteri menyatakan selain dari Terengganu mengadakan penerokaan minyak petrol oleh Petronas tidak dipanjangkan ke negeri-negeri lain.

***50. Dr. Ng Yen Yen** minta Menteri Sumber Manusia menyatakan adakah benar apabila isteri kepada suami yang mengalami kemalangan dan meninggal semasa kerja boleh mendapat pampasan SOCSO, tetapi suami kepada isteri yang mengalami kemalangan dan meninggal semasa kerja pula tidak boleh menerima apa-apa pampasan. Sekira benar, apakah tindakan yang diambil oleh Kementerian Sumber Manusia untuk mengujudkan keadilan.